

Il viadi da papa Francestg egl Irac

Lucia Wicki-Rensch tra bilanza



Lucia Wicki-Rensch avon ina baselgia destruida egl Irac.

MAD

GIUSEP CAPAUL/FMR

■ **Papa Francestg ei igl emprem papa che ha visitau igl Irac. Pils cristians iraches ein ils davos onns stai in temps fetg grev. Lur diember ei sereducius naven da varga in milliun sin aunc 250'000. Lucia Wicki-Rensch, dall'Ovra d'agid catolica internaziunala «Kirche in Not», tra bilanza e sedamonda, co igl avegnir vesa ora pils cristians en quella regiun.**

Sco papa Francestg ha era Lucia Wicki-Rensch visitau avon biebein dus onns igl Irac e saviu far ord atgnas experientschas in maletg, con dramatica che la situaziun fuv ella tiara. Medemamein ha ella rendiu viseta – sco papa Francestg – alla planira da Ninive ed als marcaus da Mosul ed Erbil. Per ils cristians digl Irac ei Lucia Wicki spir admiraziun, essend ch'els ein returnai su-

enter las sgarscheivlas e crudeivlas persecuziuns e destrucziuns tras il stadi terroristic islamic e reconstruiu lur casas, sefidond fermamein sin Diu en ina regiun aschi impurtonta per tuts cristians.

Gia dau pli baul grond agid


L'Ovra d'agid catolica internaziunala «Kirche in Not» ha susteniu ils cristians dapi la stad 2014 cun ina summa considerabla da varga 50 milliuns francs. Igl emprem ha ei setractau da segidar culs rodund 120'000 cristians, che han stuiu fugir e saviu returnar suenter ch'ils terrorists dil stadi islamic ein stai bandischai, per reconstruir lur casas, pleivs e baselgias. Il papa ha schau perscher condanavon ch'el apprezzescha igl agid tras «Kirche in Not». Quei ha el sin-

cerau visavi ina representanta dalla Ovra d'agid numnada che papa Francestg veva envidau en da far part dalla gruppa che ha accumpignau el sin siu viadi pastoral egl Irac.

Unir in pievel

In giavisch fervent dil papa ei stau da gidar a surmuntar ils gronds foss denter las diversas gruppas etnicas egl Irac. Adina puspè ha el puntuau la fraternitad denter carstgauns da diversas religiuns. La veglia identitad dils marcaus seigi vegnida destruida dil stadi islamic.

Ussa sestentien tuts stai pertuccai da terror e persecuziun da reconstruir. Ils muslims envidan en ils cristians da retur-



nar en lur vitgs ed els reconstrueschan da cuminonza baselgias e moscheas.

Sentupada cul grond ajatollah Ali al Sistani

El marcau sogn da Nadschaf ei papa Francestg s'entupaus ils 6 da mars cul grond ajatollah *Ali al Sistani*, che ha 90 onns ed ei il pli ault spiritual schiit egl Irac. 70% dalla populaziun irachesa ein schiits. Il grond ajatollah ha plidau cul papa sur da suppressiun, miseria e persecuziun da biars pievels el Proxim Orient e pertuccont la situaziun dils Palestines. Il menader spiritual digl Irac ha segirau al papa da s'engaschar per ch'ils burgheis cristians sappien viver en pasch e segirtad e far diever dils dretgs constituziunals en lur stadi.

Facit

Tenor Lucia Wicki-Rensch ha la viseta da papa Francestg dau als cristians iraches speranza e fidonza pigl avegnir dalla tiara. Ei seigi uss impurtont da nezegiar ils impuls positivs dil viadi dil papa e procurar als cristians iraches per bunas perspectivias a liunga vesta.

Lucia Wicki-Rensch, oriunda da Trun e sesenta a Lucerna, ei l'incaricada per la informaziun dalla Ovra d'agid catolica internaziunala «Kirche in Not» cun sedia a Lucerna. Ella ei stada avon biebein dus onns egl Irac. Dapi la stad 2014 ha «Kirche in Not» susteniu ils cristians iraches cun 53 milliuns francs. Avon la viseta pastorala dil papa egl Irac ha l'Ovra d'agid mess a disposiziun en tut 1,7 milliuns francs sco stipendis per 150 students dall'Universitad catolica ad Erbil. «Kirche in Not» sustegn cristians supprimi e persequitai en rond 140 tiaras.